



**Siunnersuut uunga: Naalackersuinikkut sulinermit aningaasatigut tapiissuteqartarneq pillugu
Inatsisartut inatsisaata allanngortinneqarneranik Inatsisartut inatsisaat nr. xx, uu. qqqq 2017-imeersoq
(Tapiissutinik qaffaaneq)**

(Inatsisartut Siulittaasoqarfiat)

(Siullermeerneqarnera)

Matumani Inatsisartut Siulittaasoqarfiata siunnersuutigaa politikikkut partiinut tapiissutigineqartartut qaffangaatsiarneqassasut. Tamanna pissutissaqanngivippoq sualumik nunatta aningaasarsiornikkut massakkorpiaq inissisimanagera eqqarsaatigalugu. Partiit ullumikkut naammattunik tapisiaqarput. Paarlattuanik tapeeriaaseq allanngortittariaqarluarpoq naapertuunnerusunngorlugu partiinut minnernut tulluussarlugu. Tamanna pikutsoorsinnaavoq inuiaqatigiit amerlanerusunik aningaasartuuteqartingikkaluarlugit, taamaattoqassappalli partiit annerit - IA aamma Siumut - partiinut minnernut pilliuteqartariaqartussaapput, Demokraatinili takorlooruminaatsippapput partiit taakku tamanna kissaatigissagaat nuannarissagaallu. Neriuppugulli tupaallatsinneqarsinnaassalluta.

Partiit naatsorsuutaat kikkunnit tamanit takuneqarsinnaapput aamma ersarissunik uppersaatissaqarpoq Inatsisartut Siulittaasoqarfiata una siunnersuutaa pisariaqanngilluinnaraluartoq. Naatsorsuutini takuneqarsinnaavoq partiit angisuut IA Siumullu akiitsuminnik artorsaateqarsimaqisut ukiuni kingullerni akiitsumik millisarnissaannut akiliisinnaassuseqarluarsimasut peqataanillu partii ingerlassinnaasimallugu. Taamaatut ingerlasoqarsinnaasimammat partiinut tapiissutit mikivallaarnerat pissutaasimagunangilaq.

Uagut Demokraatini immitsinnut eqqarsagutta, ajornartorsiutinginngivillugu partiitta aningaasaqarnera ataqatigiisissinnaavarput, taamaattumik Inatsisartut Siulittaasoqarfiata partiinut tapiissutit taamarsuaq qaffanniarlugit siunnersuuteqarneranut aningaasameerneq pissutigineqarsinnaangilaq.

Paarlattuanik Demokraatini kissaatigineruapput, periutsit allanngortinneqarnissaat. Aningaasalli tapiissutaasareersut iluanni aqqiisoqassaaq landskarsi amerlanerusunik aningaasartuuteqaqqunagu.

Ullumikkut Partiit Inatsisartuuniititaqartut tunngaviusumik tapiissummik pisarput qaavatigullu ilaasortaatat tapiissutisiaqaataasarlutik. Periutsip 1. januaari 2018-mi ilusitaava tunngavigalugu Atassut pilliutigineqartussaavoq, ilaasortat partiinut allanut nuunneri pissutigalugit partiitut tapiiffigineqarsinnaajunnaartussaagami. Tamanna naapertuutinnigilaq.

Demokraatiniit taamaattumik kissaatigaarput allanngortitsisoqassasoq partiit tunngaviusumik Inatsisartuuniititaqartut tapiissummik pisalersillugit. Paarlattuanik kissaatigaarput issiatitaqarnermut tapiissutit peerneqassasut taarserlugulu tapeeriaatsimik allamik partiit taasisuinik ataasiakkaanik tunngaveqalersillugu, partiit ataasiakkaat kingullermik Inatsisartunut qinersisoqarmat taasisaat tunngavigalugit tapiissutisalersillugit. Tamatuma kinguneranik partiit isertitaqanngikkaluartut ukiumut



tapiissutisalisagaluarput partiimik allisaanermut atugassaminnik taamaasillutillu tulliani qinersinissamut piareersarluarsinnaalerlutik. Tamatuma saniatigut partiit partiinik allaneersunik nuuffigineqartut akissarsitineqassaagaluarput. Aaqqissuussineq taamaattoq Demokraatit isaanni naapertuilluarnerpaasussaavoq.

Taamatulli oqareerluta, Demokraatini Inatsisartut Siulittaasoqarfiata taamatut pissusilersornera akuerisinnaangilluinnarparput. Siullermik isumaqarpugut siunnersuummut taamma politikertaqartigisumut Inatsisartut Siulittaasoqarfiat siunnersuuteqarsimasariaqanngikkaluartoq. Partiit namminneq siunnersuuteqarsimasariaqaraluarput - tassalu Siumut, IA aamma Partii Naleraq - taakku atitik ilisarnaatitillu atorlugit siunnersuuteqarsimasariaqaraluarput, ersarissitillugu, partiit taakku kissaatigigaat amerlanerunik tapiiffigineqartalernissartik.

Aappassaatut Inatsisartut Siulittaasoqarfiata pinngitsuusaarluni partiit akornanni unammilleqatigiinnerup suli assigiinnginnerulernissaanut kaammattuina akuerisinnaangilluinaqqissaarparput. Siusinnerusukkat allaaserineqareersutut mannakkut periseq partiinit annernit pilersitaanikuvoq aammalu partiit annerinnaat iluaquserumallugit, tassa imminut sullinneq inuiaqatigiit aningaasaataat atorlugit. Taava Inatsisartut Siulittaasoqarfiata soqqusaalluni inerniliuppaa, tapiissutit naammannerarlugit partiit oqaluttut qinnuteqanngiinnarunik ajunnginnerussasoq. Inatsisartut Siulittaasoqarfiat assigiimmik unammilleqatigiinnissamut sianigisaqannginnerluni? Inatsisartut Siulittaasoqarfiata sianiginnginnerlugu malittarisassat assigiimmik tamanit malinneqartussaasut? Inatsisartut Siulittaasoqarfiata tamakkerluni partiinut tapiissut piumasunuinnaq atuunnerarlugu aamma qinnuteqanngiinnarunik ajunnginnerussanerarlugu oqaatsini ajortut tulluannngitsullu kanngutsaatigisariaqaraluarpaat.

Suna tulliusava? Inatsisartut Siulittaasoqarfiata inuit pisortat ikiorsiisutaannik pinngitsoorsinnaanngitsut eqqarsaqqussanerlugit ineqarnermut tapiissummik qinnuteqarnissartik eqqarsaatigeqqaassagaat? Inatsisartut Siulittaasoqarfiata innuttaasut akissarsiakkaat kaammattorniarnarlugit nammineq piumassusertik naapertorlugu akileraarnerulaartaleqqullugit? Imak paasillugu piumagunik Top skatseersinnasut? Inatsisartut Siulittaasoqarfiata timersortartut kattuffii kaammattorniarnarlugit tapiissutit pisinnaasamik ilaannaannik qinnuteqartalissasut? Asukiaq, eqqumiikujuppoq eqqarsaat, aamma tupinnarpoq taamak saqqummiisoqartoq.

Oqareernittuut, Inatsisartut Siulittaasoqarfia ataatsimoorluni kanngusulaartariaqarpoq eqqarsaqqilaarlutillu.

Demokraatini siunnersuut una itigartissavarput, isumaqaratta, partiit aningaasanik naammattunik pisareersut. Amerlanerussuteqartulli isumaqatigiissutigissappassuk amerlanerusunik aningaasanik pialissasugut, taava pisariaqassavagut allanit partiinit ajornerusumik inissisimalerusunnata. Partiit tamarmik pingaarnertut anguniagaraat sapinngisamik anginerpaanngornissartik. Partii angineruppat sunniuteqarsinnaaneq anginerussaaq. Taamaattumik paatsoorneqarsinnaanngilaq partiit arlaannaataluunniit kissaatiginaviannngikkaa partiinit allanit ajornerusumik inissisimalernissani. Aamma partiinut tapiissut angissusissaat qanorluunniit isumaqarfigigaluaaraanni.



Kisianni Inatsisartut Siulittaasoqarfiani ilaasortat neqeroorutigineqartunut naaggaaginnartoqarsinnaanerarlugu oqalunnerannut atatillugu makku ersarissarneqarnissat kissaatigaarput:

- Inatsisartut Siulittaasoqarfiani ilaasortat angalaniaangamik Business Classimut bilittinik neqeroorfigineqartarput. Neqeroorummut tassunga ilaasortat qassit itigartitsisarpataq namminerlu kissaateqarnertik naapertorlugu Økonomiklassimut allanngortitsisarlutik?

- Inatsisartut Siulittaasoqarfiani ilaasortat angalasimagaangamik, neqeroorfigineqartarput ullormusiaqarnissaminnut. Ilaasortat qassit neqeroorut taanna naaggaartarpaat?

Paatsooqinasinnga: Demokraatini ajorinngilluinnarparput Inatsisartut Siulittaasoqarfiani ilaasortat neqeroorutitut pineqartunut tamatigut qujarussisassappata, taamaassimappalli Inatsisartut Siulittaasoqarfia partiinut neqeroorutinik naammaginnikkaluarlutik qaffaassutaasunik qinnuteqarniartunut partiinut allanut nikanarsaaniartariaqanngilaq pissusissamisuuunngilaq aammalu akuerineqarsinnaanani.

Siunnersuutip itigartinneqarnissaa inassutigaaarput.